



Istituto Cimbro
Kulturinstitut Lusern
Tel. 0464-78.96.45
info@kil.lusern.it
www.istitutocimbro.it

Ber hatta gestolt di zait?



Di zait iz gèlt – asó khütta a gekhennatar spruch, boda nia iz gest asó bar azpi in ta' vo haüt. Chronos, dar gott vo dar zait, redjart ünsar lem vo dar biage fin in grapp. Von khindargart fin affon arbatplatz khintaz gelirnt z' soina pünktlich. 'Z iz aromà gemoazlt asó tial in ünsarn hirndar ke sinamà di eltar vo üs hãm hërta gech, seänka azza soin in pensióng. Vor tausankhtar djardar di laüt hãm gelebet äna orolódje un sveldje, stëllanten inn soine tang nã dar sunn. Allz iz gebèkslt umme di mitt von 19 djarhundart: pittar industrializatzióng un pittar inventzióng vo dar aisanpãn, khennen da djüst zait iz khent hërta bichtegar. Di arbat in di groazan fabrike iz khent inngestëllt zoa zo rendra hërta mearar in hërta mindar zait. Vil groaze firme hüatn sinamà soine arbatar pinn telekãmare z' sega biavl vert sa gian in apòrt un bi lãng. Ma da peste idèa bosa hãm auzstudjart zoa zo macha hërta mearar gèlt hoazt: self service. Haützotage, in laüt gevãllten tian allz sèlbart, pittar hilf von modèrnegen ordénje azpi telefonì un computer. Sichar aniaglãz, almãnko a bötta, hatten ägeschafft apparèppaz in Amazon, un vil vo üs hãm an konto pittnaran bãnka online. In di groazan supermarkè vo dar statt sekma hërta mearar kasse äna kassiarn: di laüt stekhan 'z gèlt

in an slitz, nemmen in rest un gian vort mütat, ombrómm 'z izta niamat zo khödanan "guatn tage" odar "guatn abas". Di groazan firme haltn au ke, tianante asó, mangsa vorkhoavan allz bölvlar, ma ditzã iz nèt hërta bar. Sichar iz ke dise firme sparn vil gèlt, ombrómm sa stëlln inn mindar laüt un, no darzuar, zalnse letz. Biar machan di arbat vor se – gratis, ma vorstéat! Berden hatt prenotãrt an viazo att internet, boazt sichar biavl urn un tang ma pasãrt vorã in computer, vorglãichante hundartar hotèl un süachante di bildjèttn von roplã boda khostn mindar. I hãnz getãnt un an lestn pinne gest mèchte stoltz zo habaz dartãnt alumma un zo haba gespart a pizzle gèlt. Biane tang darnã, hãnne gevuntet in gelãichegen viazo vor lai a par èuro mearar inaran adjentzia vo moinar statt. 'Z hattmar getãnt änt vor alla da vortgedjukhata zait bodemar hettat gemak gödarn tianante eppaz ändarst: a khear affon pèrge, a bira un an tschèklar pittnan tschell, dar sèll guat libar boda paitet sidar bochan aff moin komodi. Di zait, in ta' vo haüt, hatt no vil mearar vèrt alz 'z gèlt, kartza vil vèrt zo schenkhasè in raichan un hoachan vo disar earde. Un azparar pròprio hãm zo schenkha, soinda sovl veròinen boda süachan volontãrdje zo helva. Paolo

Stian in di natür tüataz guat!


Vil laüt bartnz sa hãm gearnt un haützotage soinda o ettlane studie bodaz khön: stian in di natür tüataz guat! Ünsarne gefühle un emotzióngen soin gepuntet pitt daz sèll bobar hãm uminüm: daz grümme un di èlbar machanz höarn mearar kontènt un mindar zorne; in di stattn, anvétze, vil laüt lem alle pittnãdar in pòst boda soin an hauf sachandar augemacht von mãnn, un plètz boma mage seng a migele grümme soindarar pròpio biane odar khummane. In di statt soinda hërta an hauf laüt, liachtar, aute, bildschirme, verkèhr, rumór, alla dar sòrt, un änka azparz nèt barnen hërta, allz ditzã prink in ünsar laip an hauf strèss, azpe 'z khütta o dar Dr. Miyazaki vodar Università vo Chiba, in Giappone. Lem in di groazan stattn iz sichar dèstar, però 'z iz njãnka lai hërta allz daz peste. Vo benn dar iz att disa bèlt, dar mãnn hatt pasãrt mearar baz in 99% vo soinar stòrdja in di natür, un asó atti natür izzarse gebónt. In di lestn zaitn però dar mãnn iz nã zo giana zo leba hërta betrar vodar natür un di date vodar Onu khön ke haützotage dar 50% von laüt vodar bèlt lem in metropolitane un, in di zukunft, dar nummar vo dise laüt bart khemmen hërta gröazar. Vor ditzã iz hërta bichtegar aumachan schümmane stattn boma mage vennen èlbar, gert, grümmane plètz un parkn boda di laüt mang gian zo loava,

zo tritzla, zo lesa an libar odar djüsto zo rasta un boda di khindar o mang gian z' spila. Lem in an platz boda soin èlbar un ändre elemènte vodar natür, defãtti, tüat guat ünsar gesunthait un, azpe ma hatt darvèrt vonar forschung olandese, lem att mindar baz an kilòmetro vonar grünanlage schützt vo ettlane schaülan beata azpe atn – un hèrtzbeata, bea in di muskln, bea in kopf, änsia un depressióng. Un benn ma khent auz vodar statt un geat in di vèlt odar in balt makma stian no pezzar: in dise pòst dar air iz vrisch un mearar gesunt un vil laüt höarnse mearar entspannt un stille. Di hèrtzfrequenz un di pressióng von pluat pezzarn un dar strèss khint z' soina mindar; ditzã khint o vür umbrómm di èlbar djukhan auz molèkole gehoazt fitoncidi un ettlane studie khön ke dise molèkole tian pròpio guat dar gesunthait von laüt. Di laüt boda pasãrn vil zait in di natür tendarn zo macha mearar spòrt o un ditzã helft no mearar z' stiana gesunt. Asó gian in balt odar tritzln in a schümmana groaza bis vor ünsarn laip iz hërta pezzar baz stian in di statt. Gesichart haützotage mabar nèt lem in balt, però azta a tiabas a bötta habar mãngl zo evãdra, alóra mochparaz hërta gedenkhan ke machan a schümmana khear in di natür bartaz gesichart machan höarn vil pezzar. E.v.K.



Dar Tage vo dar muatarzung

Haüt, azpe alle 21 von fevrãro vo alln in djar, iz dar internazionale tage vo alln in muatarzungen. Ma zo vorstiana bazzez iz a muatarzung, mochparaz an earstn vorsan vo bo 'z khinta ditzã bort. 'Z khint von bort zung, boda mage soin intendãrt azpe a tòkko vo ünsar laip, boda khint ginützt z' èzza un zo smekha, odar 'z mage soin di zung boma redet un di muatarzung iz di zung boma lirnt benn ma sait khlumma. Ditzã bill o muanen ke di muatarzung haltetaz nãmp in ändarn laüt, boda ren da lestéssege zung. Di muatarzung iz però o bichte zo vorstiana di stòrdja von an lãnt un von laüt. Soprattutto Lusern iz gikhent vor di zung un umbrómm si khint giredet lai vo biane laüt. In di lestn djar però in da gãntz bèlt di muatarzungen soin khent gilekk attna sait, un dar inglese un ändre zungen boda soin giredet in da gãntz bèlt soin khent hërta mearar bichte. 'Z soinda hërta mindar laüt boda ren a khlummana zung, ma quasi alle hãm liabar ren groaze zungen. Basta saung ä di nümmer von lestn djar zo vorstiana pezzar: 500 mildjü laüt ren inglese un sinamà quasi 900 mildjü cinese. Ma mocht pensãrn ke dar 97% von laüt atti bèlt redet lai daz 4% von 7000 zungen boda soin un lai dar 3% von laüt redet di ändarn 96% von zungen. Groaze zungen azpe inglese un spagnolo soi nã zo nemma vort in platz in khlumman zungen, azpe ünsar zung, un alln zboa bochan stirbeta auz a zung atti bèlt. Allz ditzã khint gimacht bahèmmegar von naüng generazioni un technologie, umbrómm est makma ren vonar sait aft d' ändar vodar bèlt, un zo maga ren pitt mearar laüt lirntma dise groazan zungen. Zo evitàra azta di khlumman zungen, di mindarhaint, un asó di kultür un di stòrdja o, khemmen vorgèzzt, mochatta lirnen di muatarzung ka schual, von kindargart fin atti



obarschual un ma mochot o lirnen z' schraiba di zungen, asó azza nia mang khemmen vorgèzzt. Atz Lusern dise sachandarn iz sa ettlane djar bosa khemmen gimacht, però att ändre saitn vodar bèlt khinta nèt gischaugè att ditzã un di zung khint vorgèzzt. Gestarn ka Poatzan, in moi statt, in okkasióng von tage vodar muatarzung izta khent gizoagè dar film "Resina", boda iz khent gimacht atz Lusern vor a par djar. Dar film redet von khlumma coro von lãnt boda ristschãrt auzospèrra, ma a djunga diarn rift in lãnt un pitt soinar lust zo tiana salavãrtze in coro un 'z lãnt. I pensãr ke bar mochot hërta ren ünsar zung un nèt vorgèzzan ünsarne burtzan. An gruaz, Samuel Pedrazz

Vorprennen in Martzo 2020

Lusern
Sãntzta/Sabato 29
Hornung/Febrãro

Di vünve un a halbez in tages: alle ummar z' stala daz lest holtz

Di sèise: alle in platz vo Lusern un, dena, alle au pa Eck pittar musik von Palaeartearmusikantn bin Krampus

Di sibene: di ünsarn Pompiarn züntn ä in "groaz schobar holtz"

Di achte: z' èzza vor alle

Ore 17.30 – partenza per la raccolta legna lungo le vie del paese

Ore 18.00 – ritrovo in piazza, accensione fiaccole e partenza per loc. Kraütz con musica del Palaeartearmusikantn con Krampus

Ore 19.00 – accensione grande falò

Ore 20.00 – maccheronata